



歲功典第七十四卷

季秋部彙考

易經

山地剝卦

䷖

本義剝落也五陰在下而方生一陽在上而將盡陰盛長而陽消落九月之卦也

詩經

幽風七月章

九月在戶

正義謂蟋蟀也九月則在室戶之內朱暑則在野寒則依人

九月肅霜

傳肅縮也霜降而收縮萬物疏九月之時收縮萬物者是露爲霜也朱氣肅而霜降也

禮記

月令

季秋之月日在房昏虛中旦柳中其日庚辛其帝少皞其神蓐收其蟲毛其音商律中無射其數九

其味辛其臭腥其祀門祭先肝

陳房在卯大火之次也無射戌律長四寸六千五百六十一分寸

之六千五百二十四

鴻雁來賓爵入大水爲蛤鞠有黃華豺乃祭獸戮禽

陳此記戌月之候

天子居總章右个乘戎路駕白駱載白旂衣白衣服白玉食麻與犬其器廉以深

陳總章右个西

堂北偏也

是月也申嚴號令命百官貴賤無不務內以會天地之藏無有宣出

陳務內專務收斂諸物於內

乃命冢宰農事備收舉五穀之要藏帝籍之收于神倉祇敬必飭

陳農事備收百穀皆斂也要者

租賦所入之數籍田所收歸之神倉將以供粢盛也

是月也霜始降則百工休乃命有司曰寒氣總至民力不堪其皆入室

陳總至凝聚而至也

上丁命樂正入學習吹

陳吹主樂聲而言

是月也大饗帝嘗犧牲告備于天子

陳仲夏大雩祈也此月大饗報也饗嘗皆用犧牲仲秋已視

全具至此則告備而後用焉

合諸侯制百縣爲來歲受朔日與諸侯所稅於民輕重之法貢職之數以達近土地所宜爲度以給郊廟之事無有所私

陳

注朔日與稅貢等事皆天子總命之諸侯而諸侯頒之百縣使奉行也舊說

秦建亥此月爲歲終故行此數事者得之

是月也天子乃教於田獵以習五戎班馬政命僕及七駟咸駕載旌旄授車以級整設于屏外司徒

摺扑北面誓之

陳

注田獵而教之以戰陳之事習用弓矢受矛戈戟之五兵班布乘馬之政令其毛

色之同異力之強弱各以類相從也僕戎僕也天子馬有六種各一駟主之并總主六駟者爲七駟也授車於乘者以尊卑爲等級各使正其行列向背而設於軍門之屏外於是司徒摺扑於帶於陳前北面誓戒之此時六軍皆向南而陳也扑卽夏楚二物

天子乃厲飾執弓挾矢以獵命主祠祭禽于四方

陳

注奉祭祀之物當親殺獵竟則命典祀之官取

獵地所獲之獸祭於郊以報四方之神

是月也草木黃落乃伐薪爲炭蟄蟲咸俯在內皆墜其戶乃趣獄刑毋留有罪收祿秩之不當供養

之不宜者

陳

注此亦順秋令之嚴肅也

是月也天子乃以犬嘗稻先薦寢廟季秋行夏令則其國大水冬藏殃敗民多飢噎行冬令則國多盜賊邊竟不寧土地分裂行春令則煖風來至民氣解惰師興不居

陳

注大水未中東井主之不居

不得止息也

國語

單襄公論

辰角見而雨畢天根見而水涸本見而草木節解駟見而隕霜火見而清風戒寒故先王之教曰雨畢而除道水涸而成梁草木節解而備藏隕霜而冬裘具

注

辰角大辰倉龍之角星名也見者朝

見東方建戌之初寒露節也雨畢者殺氣日盛雨氣盡也天根氐亢之間涸竭也謂寒露之後五日天根朝見水潦盡竭也月令仲秋水始涸天根見乃盡竭本氐也謂寒露之後十日陽氣盡草木之枝節皆理解也駟天駟房星也隕落也謂建戌之中霜始降霜降之後清風先至所以戒人爲寒備也季秋農事畢收孟冬則天子始裘故九月可以具之

爾雅

月陽

九月爲元

易通卦驗

正陰雲

寒露正陰雲出如冠纓

太陰雲

霜降太陰雲出上如羊下如蟠石

春秋感精符

順天肅殺

霜殺伐之表季秋霜始降鷹隼擊王者順天行誅以成肅殺之威

素問

診要經終論篇

九月十月陰氣始冰地氣始閉人氣在心

注

收藏之氣從天而降肺屬乾金而主天爲心藏之蓋

故秋冬之氣從肺而心心而腎也少陰主冬令故先從手少陰而至足少陰王氏曰火墓于戊

汲冢周書

時訓解

寒露之日鴻雁來賓又五日爵入大水化爲蛤又五日菊有黃華鴻雁不來小民不服爵不入大水
失時之極菊無黃華土不稼穡霜降之日豺乃祭獸又五日草木黃落又五日蟄蟲咸俯豺不祭獸
爪牙不長草木不黃落是爲愆陽蟄蟲不咸俯民多流亡

師曠占

粟米占

粟米常以九月爲本若貴賤不時以最賤之日爲本粟以秋得本貴在來夏以冬得本貴在來秋此
收穀遠近之期也

呂氏春秋

季夏紀音律篇

無射之月疾斷有罪當法勿赦無留獄訟以亟以故

注

無射九月有罪當斷故勿赦亟疾故事也

史記

律書

閭闔風居西方閭者倡也闔者藏也言陽氣道萬物閭黃泉也其於十母爲庚辛庚者言陰氣庚萬物故曰庚辛者言萬物之辛生故曰辛北至於胃胃者言陽氣就藏皆胃胃也北至於婁婁者呼萬物且內之也北至於奎奎者主毒螫殺萬物也奎而藏之九月也律中無射無射者陰氣盛用事陽氣無餘也故曰無射其於十二子爲戌戌者言萬物盡滅故曰戌

漢書

律歷志

亡射射厭也言陽氣究物而使陰氣畢剝落之終而復始亡厭已也位於戌在九月

淮南子

天文訓

秋分加十五日斗指辛則寒露音比林鍾加十五日斗指戌則霜降音比夷則

秋三月地氣不藏乃收其殺百蟲蟄伏靜居閉戶青女乃出以降霜雪

注

秋三月季秋之月青女

天神青皇女主霜雪

無射之數四十五主九月上生仲呂

太陰在子歲名曰困敦歲星舍氐房心以九月與之晨出東方胃昴畢爲對

時則訓

季秋之月招搖指戌昏虛中旦柳中其位西方其日庚辛其蟲毛其音商律中無射其數九其味辛其臭腥其祀門祭先肝候雁來賓雀入大水爲蛤菊有黃華豺乃祭獸戮禽天子衣白衣乘白駱服白玉建白旗食麻與犬服八風水爨柘燧火西宮御女白色衣白采撞白鐘其兵戈其畜犬朝於總章右个命有司申嚴號令百官貴賤無不務入以會天地之藏無有宣出乃命冢宰農事備收舉五穀之要藏帝籍之收於神倉是月也霜始降百工休乃命有司曰寒氣總至民力不堪其皆入室上

丁入學習吹大饗帝嘗犧牲合諸侯制百縣爲來歲受朔日與諸侯所稅於民輕重之法貢賦之數以遠近土地所宜爲度乃教於田獵以習五戎命太僕及七驎咸駕戴荏授車以級皆正設於屏外司徒摺扑北嚮以贊之天子乃厲服廣飾執弓操矢以獵命主祠祭禽四方是月草木黃落乃伐薪爲炭蟄蟲咸俛乃趣獄刑毋留有罪收祿秩之不當供養之不宜者通路除道從境始至國而后已是月天子乃以犬嘗麻先薦寢廟季秋行夏令則其國大水冬藏殃敗民多飢饉行冬令則國多盜賊邊境不寧土地分裂行春令則煥風來至民氣解惰師旅並興九月官候其樹槐

六合

季春與季秋爲合季春大出季秋大內故九月失政三月春風不濟

春秋繁露

煥燠孰多篇

季秋九月陰乃始多於陽天乃於是時出溧下霜出溧下霜而天降物固已皆成矣故九月者天之功大究於是月也

古今圖書集成
大戴禮記

夏小正

九月內火內火也者大火大火也者心也遷鴻雁遷往也主夫出火主夫也者主以時縱火也陟元鳥蟄陟升也元鳥者燕也先言陟而後言蟄何也陟而後蟄也能罷貆貉鼯鼯則大若蟄而榮鞠鞠草也鞠榮而樹麥時之急也王始裘者何也衣裘之時也辰繫於日雀入於海爲蛤蓋有矣非常入也

後漢書

禮儀志

季秋之月祠星於城南壇心星廟

月令章句

入學習吹

季秋之月上丁入學習吹所以通氣也管簫笙竽塤箎皆以吹鳴者也

教田獵

季秋之月天子乃教於田獵習五戎班馬政其出以順時取禽其禮將軍執晉鼓師率執提旅率執鰲以教坐作進退疾徐之節

說文

戊月

戊滅也九月陽氣微萬物畢成陽下入地也

晉書

樂志

九月之辰謂之戊戌者滅也謂時物皆衰滅也

九月之管名爲無射射者出也言時陽氣上升萬物收藏無復出也

梁元帝纂要

季秋

九月曰季秋亦曰暮秋末秋暮商季商杪商又曰元月

三禮義宗

寒露霜降

九月寒露爲節者九月之時露氣轉寒故謂之寒露節霜降爲中露變爲霜故以霜降爲中

齊民要術

九月事宜

九月治場圃塗囷倉修竇窖繕五兵習戰射以備寒凍窮厄之寇存問九族孤寡老病不能自存者分厚徹重以救其寒

隋書

禮儀志

後齊常以季秋皇帝講武於都外有司先萊野爲場爲二軍進止之節又別墀於北場輿駕停觀遂命將簡士教衆爲戰陣之法

農政全書

季秋事宜

栽種 椒 菊 茱萸 地黃 蠶豆 牡丹 水仙宜月 柿 蒜 萱草 芥菜 苡麥 罌

粟九日 芍藥 諸般冬菜

分栽 櫻桃 楊桃

移植 枇杷 橙 雜果木

收藏 粟 諸色豆稗 五穀種 油麻 甘蔗 梔子 紫蘇 木瓜 韭子 牛蒡子 菉豆

冬瓜子 茄種 茶子 枸杞 榧子 皂角 黃菊 槐子 蟹殼治產後兒枕疹 紫草子

雜事 掘薑出土 草包石榴橘栗葡萄 采菊 築牆圍 斫竹木 斫芋 收雞種

農事占候

九月初有雨多謂之秋水 中氣前後起西北風謂之霜降信有雨謂之濕信未風先雨謂之料信 雨霜降前來信易過善後來信了信必嚴毒此信乾濕後信必如之諺云霜降了布衲著得言已有

暴寒之色也

遵生八牋

九月事宜

孝經緯曰秋分後十五日斗指辛爲寒露謂露冷寒而將欲凝結矣後十五日斗指戌爲霜降氣肅露凝結而爲霜矣故云駟見而隕霜律無射射者出也言陽氣上升萬物收藏無復出也然隨陽而終當隨陰而起無終已也辰爲戌戌者滅也謂時物皆衰滅也夏小正曰九月納火大火心星也故九月授衣提要曰九月爲霜月菊月暮秋末秋暮商季商杪秋霜辰授衣

是月也天道南行作事出行俱宜向南吉不宜用戌日犯月建不吉

是月二十日宜齋戒沐浴其日雞鳴時沐浴令人辟兵二十一日取枸杞煎湯沐浴令人光澤不老
二十八日宜沐浴

二十一日天倉開宜入山修道

千金月令曰宜進地黃湯其法取地黃洗淨以竹刀切薄曬乾用時火焙爲末礪細充湯服煎如茶

法

四時纂曰取枸杞子浸酒飲令人耐老

聖惠方曰甘菊花曬乾三升入糯米一斗蒸熟菊花搜拌如常造酒法多用細麪麴候酒熟飲一小杯治頭風旋運等疾

雲笈七籤曰是月採白朮蒸曝九次曬乾爲末日服三次不饑延年益壽

食療本草曰此月後宜食野鴨多年小熱瘡不愈食多卽瘥

纂要曰是月宜合三勒漿過此月則不佳矣用訶梨勒批梨勒菴摩勒三味和核搗如麻豆大用三兩次用蜜一斗以新汲水二斗調均傾瓮中卽下三勒熟攪密封三四日後開又攪之以乾淨布拭去汗候發定密封共三十日方成味甚美飲之消食下氣

本草曰採太乙餘糧久服不饑輕身耐寒暑

千金方曰是月內於戌地開坎深二三尺埋炭五斤土覆戌爲火之墓地以禳火災炭多可加

真誥曰十六日宜拔白永不生

古今圖書集成
九月事忌

千金月令曰是月勿食脾季月土旺在脾也

雲笈七籤曰季秋節約生冷以防痢疾勿食新薑食之成瘡疾勿食小蒜傷神損壽魂魄不安勿食蓼子勿以猪肝同飴食冬成嗽病經年不瘥勿食雉肉損人神氣勿多食雞令人魂魄不安九日勿起動牀蓆當修延算齋

又曰是月十八日忌遠行

月忌曰勿食犬肉傷人神氣勿食霜下瓜冬發翻胃勿食葵菜令食不消化

楊公忌曰二十七日不宜問疾

九月修養法

季秋之月草木零落衆物伏蟄氣清風暴爲朗無犯朗風節約生冷以防癘病二十八日陽炁未伏陰炁既衰宜進補養之藥以生氣卦剝剝落也陰道將旺陽道衰弱當固精斂神生氣在申坐臥宜向西南